

Lezioni di autonomie

Il cors di formazion organizât di 21 sindics dal laboratori di Autonomie al rive in ateneu e al segne la preziose colaborazion cu la Anci.

» DI CHRISTIAN ROMANINI

Il cuart cors di 'Lezioni di autonomie' al ven pensât e fat cu la Universitât dal Friûl e cu la Anci: si slargje duncje a gnovis autorevulis componentis istituzionâls de societât furlane la serie di incuintris nassude intal 2013 dai 12 comuns furlans dal 'Laboratori di Autonomie', che a àn slargjât la lôr rêt e cumò a son diventâts 21.

Dopo vè focalizât intes edizions passadis (ospitadis a Feagne, Spilimberc e Sant Lurinj dal Lusinç) tancj temis relatîfs al esercizi de specialitât, chest an il cors di formazion - ideât e realizât in colaborazion cu la Grame - si ten in Sale Florio li de Universitât dal Friûl e si concentre su 'Identitâts linguistiche e autonomie'.

Esordi di alt profil miercus ai 19 di Otubar aes 6 sore sere cul costituzionalist valdostan **Roberto Louvin** (professôr di dirit public comparât de Universitât de Calabrie) che al fevelarà di



'Autonomie economiche e autonomie politiche. Il model de Val di Aoste-Vallée di Aoste'. A precedi la sô lezion, la presentazion di **Massimo Moretuzzo**, sindic di Merêt di Tombe, e i intervencs introdutîfs di **Elena D'Orlando**, delegade dal retôr de Universitât dal Friûl, **Mario Pezzetta**, President Anci Fvj e **Elisabetta Basso**, presidente de Associazion culturâl La Grame.

Joibe ai 27 e sarà la volte de taule taronde su 'Identitâts linguistiche e autonomie' che e viodarà protagoniscj **Federico Vicario**, docent de Universitât dal Friûl e president de Filologjiche, **Adriana Janežic** dal Slori, **Alfredo Sandri-**

Palaz Florio a Udin, sede dal Retorât de Universitât dal Friûl

« Si slargje a gnovis autorevulis componentis istituzionâls de societât frulane la serie di incuintris nassude intal 2013

ni president dal Kanaltaler Kulturverein, **Walter Tomada** de Arlef e **Marco Stolfo** dal MuMuCEI, moderâts di **Mauro Pascolini** de Universitât dal Friûl.

Joibe ai 3 di Novembar si fevelarà di scuele. **Bruno Forte**, za diretôr scolastic regionâl, e **Ivan Strizzolo**, president de Comission paritetice Stât-Regjon, a discutaran di 'Competence primarie inte istruzion. Une propueste di norme di atuazion pal Friûl-Vj'. Al presenterà **Andrea De Nicolò**, sindic di Prissinins.

Joibe ai 10 si discutarà di 'Union europeane e dirits des minorancis linguistiche inte esperience dal Südtirol' con **Esther**

Happacher, professôr di dirit costituzionâl talian e di dirit de autonomie li de Universitât di Innsbruck, metint chescj aspjets a confront cu la 'Politiche linguistiche inte esperience furlane', analizade di **Alessandro Carrozzo** de cooperative Serling.

Grant finâl joibe ai 17 di Novembar cuant che si fevelarà di 'Valôr e impat economic de lenghe euskera' con **Patxi Bazterrika** viceconseîr pe politiche linguistiche, la educazion e la culture dal Guvier basc e 'L'autonomisim basc' che al sarà tratât di **William Cisilino**, Diretôr de Arlef. E lis conclusionis a saran di **Alberto De Toni**, retôr di chê Universitât dal Friûl che, pai sindics promotôrs, e zuie un rûl essenziâl inte bataie pe autonomie.



redazione@ilfriuli.it

SCOLTADIS DI DRIUS

Om content

El matrimoni al fas contents un om e une femine. El plui des voltis l'omp content a l'è el pari de spose.



Euronews informa

"Romea Strata", Provincie di Udin intal itinerari religjôs european

Stanziâts 40 mil euros par vuide e cartelonistiche

La Provincie di Udin insieme con 25 Comuns dal teritori provinciâl e à aderît al progjet "Romea Strata", iniziative dal Uffici pelegriņas de diocesi di Vicence. E je la riscuiverte di une vie antiche di pelegriņaç a pît su lis olmis dai antîcs pelegriņs che dal Est Europe a lavin a Rome. E passe pal Friûl, pal Venit e pe Emillie par rivâ su la vie Francigena in Toscane e infin rivâ a Rome. In graciis di une mapadure puntuâl dal itinerari, si ripropon il percors tocjant lûcs e sîts significatîfs dal teritori. Doi tocs de "Romea Strata" a passin pe nestre regjon: a son lis viis "Allemagna" (187 km di Tarvis a Concuardie) e "Aquileiense" (94 km di Miren in Slovenie a Concuardie). "La Provincie di Udin - al sclârîs il vicepresidente cun deleghe al turisim Franco Mattiussi - e à decidût di aderî a cheste iniziative par valorizâ i doi tocs de 'Romea Strata' e ancje altris doi cjamins impuartants, il 'Cammino Celeste'



di Aquilee fin su la Mont Sante dal Lussari e il Troi des Plêfs in Cjargne. La adesione e jentre inte politiche di promozion turistiche di cheste amministrazion provinciâl midiant de valorizazion dal turisim lent e de scuvierete *slow* di dutis lis ricjecs dal teritori. Scuvierete di fâ in bici, di chi la promozion dal ci-

cloturisim ma ancje a pît, traviers i cjamins. Une modalitât di viaç aromai simpri plui difondude, baste viodi il numar dai pelegriņs che an par an a fasin il troi di Sant Jacum di Galizie (Santiago di Compostela). La Provincie di Udin e à ben presint la potenzialitât di promozion di dut il teritori regionâl, a nivel internazionâl, derivabil dal unificâ, inte ufierte turistiche, il sisteme des pistis ciclabilis (la ciclovie Alpe Adria, premiade di pòc a nivel european, e je stade puartade indenant cul contribût concret di chest Ent) cun cheste realtât, i percors religjôs, in espansion continue in tiermins di atenzion e di partecipazion. Propit par chest la Provincie di Udin e destinât al Uffici Pelegriņas de Diocesi di Vicence un contribût di 10 mil euros pe realizazion di une vuide in colaborazion cul "Touring" e 30 mil euros pe instalazion de cartelonistiche su dut l'itinerari de "Romea Strata" che e tocje il teritori provinciâl.